

Ambil keputusan bersara untuk tumpu tugas guru, jurulatih

Roslinda tinggalkan olahraga

ROSLINDA
SAMSU

Oleh ZAZALI JAMIAN

sukan@utusan.com.my

KUALA LUMPUR - Belum pun bermula Sukan SEA 2013 di Myanmar, Malaysia sudah terlepas genggam sebutir pingat emas apabila ratu lompat bergalah wanita negara Roslinda Samsu mengumumkan untuk bersara, semalam.

Roslinda yang juga penyumbang konsisten pingat emas pada setiap penyertaan Sukan SEA sejak 2005 hingga 2011 itu turut mengakui sudah memaklumkan kepada Kesatuan Olahraga Malaysia (KOM) berhubung keputusannya.

Kata Roslinda yang bakal mencecah usia 31 tahun pada Jun ini, keputusan berkenaan dibuat kerana ingin memberikan komitmen terhadap kariernya sebagai guru dan jurulatih.

"Keputusan ini saya buat selepas berfikir panjang dan merasakan tiba masanya untuk saya bersara selain telah banyak berkorban untuk mencapai kejayaan.

"Saya telah memaklumkan kepada KOM menerusi surat dan saya berharap atlet yang ada mampu meneruskan kecemerlangan.

"Daripada apa yang saya lihat atlet yang sedia ada memerlukan masa untuk menghadihkan emas buat negara dalam acara lompat bergalah mungkin dalam dua kali Sukan SEA selepas ini mereka mampu un-

INFO

Nama: Roslinda Samsu

Tinggi: 160cm

Berat: 52kg

Tarikh Lahir: 9 Jun 1982

Tempat kelahiran: Kedah

Rekod Peribadi Terbaik: 4.40m

Pencapaian Terbaik

- Layak ke Sukan Olimpik Beijing 2008
- Perak Sukan Asia Doha 2006
- Emas Sukan SEA Manila 2005
- Emas Sukan SEA Korat 2007
- Emas Sukan SEA Laos 2009
- Emas Sukan SEA Palembang, 2011

tuk meraihnya," katanya ketika dihubungi *Utusan Malaysia* di sini, semalam.

Roslinda yang memperoleh ijazah Pendidikan Jasmani, Universiti Putra Malaysia (UPM), Oktober lalu ketika ini masih menunggu keputusan penetapan untuk tempat mengajar daripada Kementerian Pelajaran Malaysia (KPM).

Sepanjang menyertai Sukan SEA sejak 2001 hingga 2011, Roslinda menyumbang empat pingat emas buat negara selain menjadi pencabar utama pada kejohanan pe-

ringkat Asia.

Buat masa ini terdapat dua atlet lompat tinggi bergalah yang dirasakan berpotensi melangkah lebih jauh.

Mereka ialah Chuah Yu Tian, 17 tahun dalam kategori wanita yang mempunyai catatan peribadi terbaik 3.90 meter manakala lelaki adalah pemenang pingat emas Sukan Malaysia 2012, Iskandar Alwi dengan lompatan terbaiknya 4.90m dicipta pada Kejohanan Terbuka Thailand Oktober lalu.

Sementara itu, Presiden KOM, Datuk Zainal Abidin Ahmad mengesahkan telah menerima surat persaraan daripada Roslinda.

Kata Zainal, pihaknya akan terus berusaha untuk mencari pengganti kepada ratu lompat bergalah negara itu menerusi kejohanan terdekat pada tahun ini.

"Saya perlu menilai atlet-atlet menerusi kejohanan di peringkat kebangsaan dan negeri kerana tumpuan kita adalah untuk mendapatkan lebih ramai atlet baru.

"Diharapkan selepas ini tiada lagi halangan buat atlet negara untuk mendapatkan tempat beraksi pada Sukan SEA," kata Zainal.

Kejohanan pertama bakal menjadi tumpuan dalam kalendar KOM 2013 ialah Grand Prix (GP) Malaysia pada 20 April ini yang juga akan menjadi medan kelayakan buat atlet tempatan memburu slot ke Sukan SEA Myanmar pada Oktober.